

# 緇門崇行錄

明古杭雲棲寺沙門株宏輯

## △清素之行第一

### 不作齋會

劉宋，僧旻，七歲出家，以經義宗海內，號旻法師。修繕寺宇，造設經像，放生布施，未嘗倦廢。或問：「和尚所修功德多矣！不聞建大齋會，恐福事未圓。」旻曰：「大齋難得盡理，且米菜鹽醋，樵水湯炭，踐踏洗炙，傷害微蟲，故不為也。如復求寄王宮、官府有勢之家，彌難盡意，不如已之。」

贊曰：今人作一福事，必起齋會，名曰圓滿；乃至掩關僧半期以後，即於關中營營焉，晝夜經畫，預辦齋會，無復正念。嗟乎！旻師之言，真萬世龜鑑。

也！

### 受施隨散

梁，慧開，吳郡海鹽人。歷聽藏、旻二師經論，講演名世。豫章守謝讌迎請說經，厚加覲遺，還未達都，分散已盡。晉安守劉業餉錢一萬，即贍寒餒，曾不終日。情性疏率，不事形儀；衣服塵滓，未嘗舉意浣濯。

贊曰：講法而不受覲遺，是之謂法施。噫！安得人人法施如開公乎？

### 蟲鳴塵積

梁，道超，從靈基寺旻法師學，獨處一房，屏絕賓侶，塵埃滿屋，蟋蟀鳴壁。中書郎張率謂曰：「蟲聲聒耳，塵多埋膝，安能對此而無忤耶？」答曰：「時聞此聲，足代簫管；塵隨風來，我未暇掃，致忤名賓，為愧多矣！」率大歎服。